

# INUIT ATAQTIGIIT

## Inatsisartuni



UKA 2018/155  
25.10.18.  
Peter Olsen

**Kalaallit Nunaanni ilisimatusarnernut tamanut ataatsimut qarasaasiami paasissutissanik katersivimmik pilersitsinissamik periarfissat misissorneqarnissaat pillugu Naalakkersuisut peqquneqarnissaannik Inatsisartuni aalajangiiffigisassatut siunnersuut.**

**(Inatsisartunut ilaasortaq Mimi Karlsen, Inuit Ataqatigiit)**

Ilisimatusarnikkut nunarput soqutigineqarluartoq ukiuni kingullerni malunnarsigaluttuinnarpoq. Tamanna nuannerpoq pitsaasuullunilu.

Nunatsinni pitsaasumik sukut tamatigut ineriartortitsiuassagutta, taava pingaarpoq nunatsinni ilisimatusarnikkut atugassarititaasunik sukut tamatigut pitsanngorsaaqataajuarnissarput.

Ilisimatusarnikkut paasisat ilisimalikkallu nunamut iluaqutaallualertarmata, soorlu inuussutissarsiornikkut aningaasarsiornikkullu.

Ujarassioq ilisimatoq nunatsinneersoq assersuutigiinnarsinnaavarput Minik Rosing. Minik Rosingip Kangerlussuup eqqaani sermersuup eqqaani, sioqqanik sermersuarneersunik misissuisimavoq.

Paasisimavaalu sioqqat taakku annertuumik inuussutissartaqartut, naggorissaanermilu atorluarneqarsinnaasut; assersuutigalugu narsaatit naggorluttut sioqqanik taakkuninnga nakkalaartitsivigigaanni taava narsaat naggorluttoq naggorissunngortinneqarsinnaalluni.

Assersuutit appaattut taaneqarsinnaavoq;

Arsuup eqqaaniittumi Ikkami uumasuaqqat tappiorannartut aningaasarsiutaalluarsinnaasut aamma paasineqarsimapput. Paasineqarsimavoq tappiorannartut taakku laktoseqanngitsumik immuliornermi atorneqarsinnaasut.

Ikkamiittut sukat kalkiusut, tamakku tappiorannartunik enzyminillu immikkut piginnaasalinnik akoqarsimapput.

Sukat immamiittut akorisaat enzymit immikkooruteqarsimapput, Kalaallit Nunaata imartaanut nillertumut naleqqussarsimasuullutik. Taamaalillutik enzymit allat sapigaannik piginnaasaqarlutik.

Assersuutigalugu sapigalinnut laktoseqanngitsumik immuliornermi tamanna iluaqutigineqarsinnaavoq.

Suliffeqarfik "Coldzymes" enzyminik taama ittunik paaanissamut siullernut ilaalluni Namminersorlutik Oqartussanit akuerineqarsimasoq paasisatta ilagivaat. Misissuisut ilisimatusartullu tassaapput;

Mikrobiologimik ilinniarsimasoq ilisimatusartorlu Aviâja Lyberth Hauptmann aammalu mikrobiologimik nunatsinni sammisalik Peter Stougaard.

Minik Rosingip, Aviaja Lyberth Hauptmannip aammalu Peter Stougaardip ilisimalersimasaat nunatsinnut pingaaruteqarluinnaqqissaarput; minnerunngitsumik nunatta aningaasarsiornikkut iluaqutigilluarsinnaasaannik ilisimatusarsimanagerat pissutigalugu.

Soorlu aamma siunnersuuteqartup nammineq oqaatigigaluaraa, tassalu nunatsinni ilisimatusaatit pissarsiarineqarsinnaagaluartut, kisiannili aatsaat nalunngikkaanni ilisimatusaat sumut tunngassuteqarnersoq. Tamannalu tunngavigalugu ajornakusoorlunilu pisariusinnaasoq paasissutissanik ujarlersinnaaneq eqqarsaatigalugu.

Taamaattumik tamanna pillugu Mimi Karlsen ilisimatusaatinik ujarlersinnaaneq pitsaaneruleqqullugu Kalaallit Nunaanni ilisimatusarnernut tamanut ataatsimut qarasaasiami paasissutissanik katersivimmik pilersitsinissamik periarfissat misissorneqarnissaat pillugu Naalakkersuisut peqquneqarnissaannik Inatsisartuni aalajangiiffigisassatut siunnersuuteqarpoq.

Siunnersuutaasup anguniagaa, minnerunngitsumik kikkunnut tamanut ilisimatusarnermik suliaqartuusunut, minnerunngitsumillu ilinniartuutitsinnut pitsaasumik sunniuteqartussaammat, Inuit Ataqatigiinniit Mimi Karlsenip siunnersuutaata akuerineqarnissaa inassuteqaatigaarput.

Qujanaq